

ВО ПЯТНИЦА 8-Й СЕДМИЦЫ ПО ПАСХЕ

В ЧЕТВЕРТОК ВЕЧЕРА

На Господи воззвах: поставим стихов 6: праздника 3, и минеи, 3.

Стихиры праздника, глас 4-й:

Подобен: Дал еси знамение:

Днесь найде Пресвятаго Твоего Духа действие Господи на апостолы Твоя, и премудры показав боговедением, исполни я блаженного учения Твоего. Темже Твое спасительное смотрение славим, Иисусе всесильне, Спасе душ наших.

Днесь дух Твой всесильный Владыко, от Отца посылается, Тебе единосущный, во огненных языцех, подаяти же величия Твоя глаголати Апостолы Твоя устрои. Темже спасительное Твое смотрение славим, Иисусе всесильне, Спасе душ наших.

Днесь излил еси Утешителя Твоего Духа, Спасе, дарования, подав человеческому естеству пророчествовати, якоже рекл еси Слове, и Троице поклонятися нераздельно наказал еси. Темже Твое спасительное смотрение славим, Иисусе всесильне, Спасе душ наших.

Слава, и ныне: глас 2-й:

Троицу единосущную песнословим, Отца и Сына, со Святым Духом: сию бо проповедаша вси пророцы, и апостоли с мученики.

На стиховне стихиры, глас 1-й:

Подобен: Небесных чинов:

Моисей на горе сущаго огнем виде, но и Боговидцем и мудрым апостолом, Дух огнезрочно сходит ныне, аки явственно просвещая, якоже един Бог глаголавый тогда, и ныне в тождестве естества.

Стих: Сердце чисто созижди во мне, Боже, и дух прав обнови во утробе моей.

Огнезранными языки богоглаголивии, к воде крещения Божественнаго зовуще, риторов буесловия безбожных огнем Духа попалиша: но просвети Утешителю, и нас верно богословящих Тя.

Стих: Не отвержи мене от лица Твоего, и Духа Твоего Святаго не отыми от мене.

И иже в веществе Боже мой Тебе послужившыя приемшыя дебелисть вещества неизреченно, якоже древле невестественных огнем новотвориши пламенные духа, яко многопеваемь еси, яко чуден в делах Твоих Человеколюбче.

Слава и ныне: глас 6-й:

Утешителя имуща ко Отцу Христа Бога, Утешителю иному пришедшу к нам на землю днесь, Духу Святому верою поклонимся.

Ныне отпускаеши: **Трисвятое. По Отче наш.**

Тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

[Слава: святого, аще имать. И ныне: празднику]

И отпуст.

Знай и се, яко службы святых, прилучившихся в субботу грядущую, и неделю всех святых, поем единого наперед, а другого в настоящий пяток на повечерии.

Во Пятница 8-й седмицы по Пасхе

На Утрени

На Бог Господь: тропарь праздника глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе. [Дважды.]

[Слава: святаго, аще имать. И ныне: празднику]

По 1-й кафисме седален, глас 1-й:

Подобен: Гроб твой:

Се пророческая исполняются проречения, сия бо зарями примрачными покрывый, в будущих явление, яко Бог Утешитель, ныне излился апостолом богато, теми же и верно поклоняющимся Троице несозданней.

Слава, и ныне: тойже.

По 2-й кафисме седален, глас 8-й:

Подобен: Премудрости:

Всесвятый Дух ныне сошед на апостолы видом огня, ужасом исполни язык собрания: языки бо огненными Человеколюбче глаголющим, свою кийждо беседу слышаше. Темже и чудо неверным, яко пьянство, верным же спасение воистинну познаваше: сего ради славим державу Твою Христе Боже, прегрешений оставления просяще, низпослати богато рабом Твоим.

Слава, и ныне: тойже.

Канон праздника, глас 4-й: со ирмосом на 8. И святаго на 4. По 9-й песни експостиларий праздника дважды.

Песнь 1. Глас 4-й:

Ирмос: Божественным покровен медленоязычный мраком, извитийствова богописанный закон: тину бо оттряс очесе умнаго, видит Сущаго, и научается Духа разуму, хваля Божественными песнями.

Рекоша чистая и честная уста: разлучения вам не будет, о друзи! Аз бо на Отчем вышнем престоле соседя, излию Духа, возсияти желающим благодать независтную.

Предел прешедшее истиннейшее Слово, тихообразно совершает сердце: дело бо скончав, возвесели друти, дыханием нужным и огненными языки, подав Духа Христос, якоже обещася.

И минеи на 4.

Катавасия: Божественным покровен ...,

Песнь 3.

Ирмос: Разверзе утробы нечадствовавшия узы, досаду же неудоботерпиму благочадствующия, едина молитва пророчицы древле Анны, носящия дух сокрушен, к сильному и Богу разумов.

Непостижима есть Богоначальнейшая: ветия бо изъяви безкнижныя, рыбаки премудрыя, заушающия словом, и от глубокия нощи изимающия люди безчисленны, блистанием Духа.

Бяше исходен от нерожденна Света, всесильный сияющий Свет, Егоже Сыном Отческия власти, ныне являет срасленное озарение, огненный глас в Сионе языком.

И минеи на 4.

Катавасия: Разверзе утробы ...,

Кондак святого минеи, и икос, и седален его.

Слава, и ныне: Таже седален, глас 8-й:

Подобен: Повеленное тайно:

Спасовы рачителие радости исполнишася, и дерзновение прияша, прежде боящихся: яко Дух Святыи днесь свыше сниде на дом ученический, и ин иная глаголаше к людем. Языцы бо разсеяшася, видими яко огнь: и сих не опали, но паче ороси.

Песнь 4.

Ирмос: Царю царей, яковый от яковаго един Слове произшедый от Отца безвиновнаго, равномошнаго Твоего Духа апостолом истинно послал еси, яко Благодетеля поющим: слава державе Твоей Господи.

Баню Божественную пакибытия словом растворив, ссложенное естество, дождоточиши ми струю от нетленнопрободеннаго Твоего ребра, о Божий Слове, запечатлея теплотою Духа.

Преклоняют вся Утешителю колена, Сыну же Отчу, Отцу срасленному, в Лицех бо видеша трегубых Существо истинное, неприкосновенное, безлетное, единое: возсия бо свет благодать Духа.

Да исполнятся вси Богоначальнейшим, елицы служителие Трисветлаго Существа: паче естества бо совершает яко благодетель, и огнесветит Христос во спасение, всю дая благодать Духа.

И минеи на 4.

Катавасия: Царю царей ...,

Песнь 5.

Ирмос: Решительное очищение грехов, огнедухновенную примите Духа росу, о чада светобразная церковная: ныне от Сиона бо изыде закон, языкоогнеобразная Духа благодать

Якоже благоволи самовластно, необладанный исходит Дух от Отца, умудряя в языках апостолы, печатая живоносное Слово, Отчесильное, сообразное, Егоже Спас рече.

Да исцелит убо смыслы от греха, и се устрояше апостолов, Бог Слово всеначальное, пречистый дом, в немже единомощнаго же и ссущественнаго ныне вселяется Духа свет.

И минеи на 4.

Катавасия: Решительное очищение ...,

Песнь 6.

Ирмос: Очищение нам Христе и спасение Владыко, возсиял еси от Девы, да яко пророка от зверя морского персей Иону, от тли исхитиши, всего Адама всеродна падшаго.

Истинный нам правый во утробах вечно принятым Дух, да обновиши Отчеходный, и всесовокупленно, вещества ненавистнаго палительный скверн, кала же смыслов чистительный, Вседержителю.

Желательное достояние апостолом, сионяном чающим Твоего пришествия, познание Дух Отчорожденна Слова, речь жестокою языческих ласкательств скоро показав, огнедохновенно утверждаети.

И минеи на 4.

Катавасия: Очищение нам ...,

Кондак, глас 8-й:

Егда снизшед языки слия, разделяше языки Вышний: егда же огненные языки раздаяше, в соединение вся призва, и согласно славим Всесвятаго Духа.

Икос: Скорое и известное даждь утешение рабом Твоим Иисусе, внегда унывати духом нашим, не разлучайся от душ наших в скорбех, не удаляйся от мыслей наших во обстояниях: но присно нас предвари. Приблизися нам, приблизися везде Сый, якоже со апостолы Твоими всегда еси, сице и Тебе желающим соедини Себе Щедре: да совокуплени Тебе поем, и славословим Всесвятаго Духа Твоего.

Песнь 7.

Ирмос: Согласная возгуде органская песнь, почитати златосотворенный бездушный истукан: Утешителя же светоносная благодать почествует, еже вопити: Троице Единая, Равносильная, Безначальная, благословена еси.

Гласа пророковещательнаго не разумевше, глаголаху безумнии виносотворенное пьянство, речи яко странны слышаша апостолов: благочестивии же Тебе вопием божественно: Богодетелю всех благословен еси.

Божественное учение возгреме видяй видения божественный Иоиль, Богоначальнейшаго, имже излию, рек, якоже Слова, Духа Моего свозопиющим: Естество Тривещанное Светлое, благословен еси.

Троичную убо раздели зря благодать, яко да явит три Ипостаси, почитати в простоте власти, но во едином ныне дни Господском, Сын, Отец и Дух благословен.

И минеи на 4.

Катавасия: Согласно возшуме ...,

Песнь 8.

Ирмос: Разрешает узы, и орошает пламень трисветлый богоначалия образ, поют отроцы, благословит же Единого Спаса и Вседетеля, яко Благодетеля, сотворенная всяческая тварь.

Память Христос человекоспасительных словес, яже от Отца слышав апостолом рече, Дух устроит языкоогненным видением, посаждая благословенно усвоенную, учуженная же поет Тя тварь.

Спасительно самовладычный Един, Свет самосиятельный, и подательный света сый, пришел еси исполняя апостолы, честный яко верх Твоим рабом, насытителный же Дух подаваеши.

Пояху пророк духонасыщенная уста, Твое телесное, о Царю, пришествие, и Дух от недр Отчих произшедший, несозданный, зданнодетелен, сопрестолен Тебе, единого вочеловечения верным честь.

И минеи на 4.

Катавасия: Разрешает узы ...,

Поем Честнейшую:

Песнь 9.

Ирмос: Радуйся Царице, матередевственная славо: всяка бо удобообращательная благоглаголивая уста витийствовать не могут, Тебе пети достойно: низумевает же ум всяк Твое Рождество разумети. Темже Тя согласно славим.

Пети подобаше естественнोजизненную Отроковицу: едина бо во чреве скры Слово, таящееся недугующаго человеческого естества. Иже в десных странах ныне седяй Отчих, посла благодать Духа.

Елицем дхну боготочная благодать, светящаяся, блистающе, изменяеми странным изменением благолепнейшим, равносильствующую несекому уведевши премудрость, Трисветлое существо славим.

И минеи на 4.

Катавасия: Радуйся Царице ...,

Ексапостиларий праздника.

Подобен: Небо звездами:

Всесвятый Душе, исходяй из Отца и Сыном пришедый к безкнижным учеником, Тебе Бога познавших спаси и помилуй всех.

Слава: святаго, аще есть: аще ли ни,

Слава, и ныне: праздника

На хвалитех поставим стихи минеи, аще есть:

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 6-й:

Подобен: Трдневен:

Духу Всесвятому, * со Отцем певаемому, * и с Сыном же, воспоим вернии, * кланяющиеся непрестанно: * Троицу пресвятую Бога людие славословим.

Стих: Сердце чисто созижди во мне, Боже, и дух прав обнови во утробе моей.

Тебе Духа Утешителя * верно восхвалим, * со священными и божественными апостолами: * в третий бо час, якоже обеща, * Тебе от Отца светов посла Христос.

Стих: Не отвержи мене от лица Твоего, и Духа Твоего Святаго не отыми от мене.

Троице Святая, слава Тебе, * в песнях покланяюся троически, * Отцу, и Духу правому, с Сыном: * и поя Тебе Троице божественне, * достодолжно верно почитаю.

Слава, и ныне: глас 8-й:

Егда духа Твоего послал еси Господи, сидящим апостолом, тогда еврейския дети зряще ужасався ужасом: слышаху бо я вещающа иными странными языки, якоже Дух подаваше им. Невежди бо суще умудришася, и языки в веру уловивше, божественная ветийствовашу. Темже и мы вопием Ти: иже на земли явлейся, и от прелести спасый нас, Господи слава Тебе.

Таже, Благо есть исповедатися Господеви

Трисвятое. И по Отче наш:

Тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

Таже ектения: Помилуй нас Боже: Час 1. И отпуст.

Во Пятница 8-й седмицы по Пасхе На Литургии

Блаженна от канона праздника, песнь 7-я и 8-я на 6.

Ветующим Божественная величия апостолом, Духа действо непщевашеся пиянство неверствующим, имже Троица познавается, един Бог отец наших. [Дважды.]

Нераздельное естество православно богословим Бога Отца Безначального, тояжде власти Слова и Духа, благословен еси, зовуще, Боже отец наших.

Память Христос человекоспасительных словес, яже от Отца слышав апостолом рече, Дух устроит языкоогненным видением, посаждая благословенно усвоенную, учуженная же поет Тя тварь.

Слава: **С**пасительно самовладычный Един, Свет самосиятельный, и подательный света сый, пришел еси исполняя апостолы, честный яко верх Твоим рабом, насытителный же Дух подаваеши.

И ныне: **П**ояху пророк духонасыщенная уста, Твое телесное, о Царю, пришествие, и Дух от недр Отчих произшедший, несозданный, зданнодетелен, сопрестолен Тебе, единого вочеловечения верным честь.

По входе тропарь праздника, глас 8-й:

Благословен еси Христе Боже наш, иже премудры ловцы явлей, низпослав им духа святого, и теми уловлей вселенную, Человеколюбче слава Тебе.

И храма святого: И тропарь святого, аще есть, таже кондак храма. Слава: кондак святого.

И ныне: кондак праздника, глас 8-й:

Егда снизшед языки слия, разделяше языки вышний: егда же огненные языки раздаяше, в соединение вся призва, и согласно славим всесвятого Духа.

Прокимен, глас 8-й: Во всю землю изыде вещание их, и в концы вселенныя глаголы их. [И до отдания.]

Стих: Небеса поведают славу Божию, творение же руку Его возвещает твердь.

К Римляном Послание, зачало 82: (Рим. 2:14-29)

Братие, егда языцы, не имуща закона, естеством законная творят, сии, закона не имуща, сами себе суть закон. Иже являют дело законное написано в сердцах своих, спослушествующей им совести, и между собою помыслом осуждающим или отвещающим, в день, егда судит Бог тайная человеком, по благовестию моему, Иисусом Христом. Се ты Иудей именуеши, и почиаша на законе, и хвалиши о Бозе, и разумеши волю, и разсуждаеши лучшая, научаемы от закона, уповая же себе вожда быти слепым, света сущим во тме, наказателя

безумным, учителя младенцем, имуща образ разума и истины в законе. Научая убо инаго, себе ли не учиши, проповедавая не красти, крадеши; глаголяй не прелюбы творити, прелюбы твориши; гнушаяся идол, святая крадеши; иже в законе хвалишися, преступлением закона Бога безчествуеши. Имя бо Божие вами хулится во языцех, якоже есть писано. Обрезание бо пользует, аще закон твориши. Аще же закона преступник еси, обрезание твое необрезание бысть. Аще убо необрезание оправдание закона сохранит, не необрезание ли его во обрезание вменится, и осудит еже от естества необрезание, закон совершающее, тебе, иже Писанием и обрезанием еси преступник закона. Не бо иже яве, Иудей есть, ни еже яве во плоти, обрезание. Но иже в тайне Иудей, и обрезание сердца духом, а не Писанием, емуже похвала не от человек, но от Бога.

Аллилуиа, глас 1-й: Словом Господним небеса утвердишася, и Духом уст Его вся сила их.

Стих: С небесе призре Господь, виде вся сыны человеческия.

Евангелие от Матфея, зачало 14: (Мф. 5:33-41)

Рече Господь: паки слышасте, яко речено бысть древним: не во лжу кленешися, воздаси же Господеви клятвы твоя. Аз же глаголю вам не клятися всяко: ни небом, яко престол есть Божий, ни землею, яко подножие есть ногама Его, ни Иерусалимом, яко град есть великаго Царя. Ниже главою твоею кленися, яко не можеши власа единого бела или черна сотворити. Буди же слово ваше: ей – ей, ни – ни, лишше же сею от неприязни есть. Слышасте, яко речено бысть: око за око, и зуб за зуб. Аз же глаголю вам не противитися злу, но аще ты кто ударит в десную твою ланиту, обрати ему и другую, и хотящему судитися с тобою и ризу твою взяти, отпусти ему и срачицу. И аще кто ты поймет по силе поприще едино, иди с ним два.

За Достойно: поем и до отдания ирмос:

Ирмос: Радуйся Царице, матередевственная славо: всяка бо удобообращательная благоглаголивая уста витийствовати не могут, Тебе пети достойно: низумевает же ум всяк Твое Рождество разумети. Темже Тя согласно славим.

Причастный: Дух Твой Благий наставит мя на землю праву.
Аллилуиа. [Трижды.]

И по отпущении на литургии глаголется 9-й час по обычаю.